

歷代畫家詩文集

懷麓堂稿
(七)

臺灣學生書局 印行

歷代畫家詩文集

懷麓堂稿
(七)

臺灣學書局印行

臺灣學書局
PDG

懷麓堂文後集卷之二十一

碑碣銘

明故陝西寧州知州贈光祿大夫柱國少傅
兼太子太傅吏部尚書劉公神道碑銘

漢之守令多久任至長子孫或十餘年或二十餘年
然不數見在我先朝法令近古其最久者時則有
若陝西寧州知州劉公蓋三十二年然後去前此未
之有也公生于洪武己酉年三十而舉于鄉三十一
而登進士三十三而為縣三十六而為州七十而致
仕至八十四而卒又五十年贈都察院右副都御史

階通議大夫又三年加贈少傅燕太子太傅吏部尚書階光祿大夫勲柱國於是寧州之名益顯公諱綱字文紀其先自漢更始時居潁川有曰元者避亂居嵩南至建武初占籍于鈞州今河南開封府地也唐以下譜逸不可考公高祖間政仕元提舉白沙鎮鐵冶曾祖坤祖德忠考大淵贈如其官公生而孝友敦確有幹局初為縣得延安府之府答號難治教法並舉頌聲大作及為州州人聞公威名皆色懼公至則曰久敝之地刑非所先乃因俗為治不專繩墨民翕然樂之民未識樹藝教以播種未知學則教以書詩

植善鋤惡習為之變既又均賦役置屯田簡兵練武
百廢俱振以內艱去代者已至民不忍釋公詣 闕
請留

太宗曰民既念綱可令起復兼傳之任而別用代者
公心喪莅事未嘗輕用罰而民不忍犯經鞠問者退
無異辭嘗署按察司事旬日間屢釋冤獄州有龍尾
湫時出光怪遠近聚觀公伺其光動手射之應矢而
滅既而洩其水乃巨鼃也妖遂息間行野中值橫石
為虹馬驚不度公諦視之乃次梁公碑范文正公所
撰者也即起豎之為建祠焉其他善政多不可殫紀

此其異者耳間又嘗丁外艱考績者殆十數皆以州人奏留而官亦不調

仁宗朝特賜璽書褒異及四品章服嘗至京師

上親召問勞以酒饌時人榮之

英宗朝以老乞休章數上乃得致仕去之日哭聲振野州舊有六君子祠祀狄公以下嘗為刺史者民生祀公其中改名七君子祠及家居遺問踵至其卒也有裘糧致弔者焉其得民心如此公配李氏先卒繼李氏贈一品夫人一子隴舉懷才抱德不起亦贈同公官孫三長為光祿大夫柱國少傅兼太子太傅吏

部尚書宇舉成化壬辰進士累今官材行動績偉然
時望為

今天子所簡任其贈三代以此次寧義官次定早卒
曾孫十長佑次佐次儒儒舉鄉貢知長垣縣次信次
俸以武功累官錦衣衛指揮使次俊次仁舉正德戊
辰進士為翰林庶吉士次佳國子生次保早殤次傳
孫女三長適任宣次李曾次旌德縣丞張深曾孫女
九長適義官李厚次武學訓導李璠次李勇次李金
次義官李運次程順次國子生古源次錦衣衛千戶
屠璋公葬于某山之原少傳公既貴欲遵典式立石

墓道以昭不朽自述公狀請予銘予惟世之論有後
者必曰位不稱德君子固未嘗責報于天而理有不
能違者夫積久而發發必大公以平生所學專施于
一方官不過郡守再世而少傳公出焉足以言事彼
謫越數十年然後顯不可謂不難矣今舉甲第者三
世在仕籍者四人文武並用中外相映方承而未艾
有家之盛鮮克過之是不足為善者勸哉銘曰
陝之西疆有州曰寧曰有賢守來侯其氓氓有幸願
侯實營之民有外侮侯則櫻之三十二年政舉人存
不食而飽不衣而溫氓之戴侯我父我昆氓之頌侯

侯子侯孫侯子既善侯孫乃發內秉政柄外著功伐
文揚武揭其聲烈烈莫為之後有播誰穫一郡雖小
其名則長沒為三孤身後之光嵩洛之間有河湯湯
公澤斯流百世勿忘

明故資善大夫太子少保吏部尚書致仕贈
太子太保許公神道碑銘

有居大官當重任而人望之退而人慕且薦之沒
而人惜之若不盡其用者是惡可彊合幸得蓋必有
所繇致即是而觀不待接其言考其世其人可知也
若河南許公固可証我公諱進字季升舉成化丙戌

進士權監察御史出按并肅山東風裁卓卓都御史
陳鉞附太監汪直啓釁遼東為御史強珰所劾公亦
率諸御史論之珰被逮謫戍公與凡劾鉞者皆奪俸
三月遷山東按察司副使監鄉試事有欲私貴家子
者執不從東昌有武官子懷金挾一儒生飲于酒家
是夜被殺有司疑生所為備極拷訊生誣服公徧閱
商賈見酒家以殺之翼日買布數疋訊之遂伏辜弘
治戊申遷廣西按察使未上擢都察院右僉都御史
巡撫大同贊理軍務上邊事數條北虜入貢驕詐百
出公嚴為節制遂不得逞武邑王聰沐不律公奏置

于法降為庶人又奏太監石岩誣公擅用旗幟降
知兗州府甲寅遷陝西按察使虜犯西陲復命公
為左僉都御史巡撫甘肅吐魯番世讎哈密遣部酋
逐其王入據其城久不復公與都督劉寧輩出調赤
斤罕東諸夷為聲援冒雪夜進城中人從亂者餘八
百登臺自保公諭使下或欲盡屠之公不可乃止丙
辰以功遷右副都御史巡撫陝西不屈權貴召入
為戶部右侍郎刑部主事鄭岳下獄不以罪公疏白
之羣見公會奏修省數事庚申虜入大同命兼左
僉都御史提督軍務興平江伯陳公銳出師進剿陳

以無功獲譴或因以累公遂令致仕歸數年廷臣論薦者數十疏乙丑

今天子即阼召為兵部左侍郎督團營兵馬進尚書賜蟒衣三襲正德丙寅公上疏請勤

聖學戒遊逸改吏部尚書賜玉帶加太子少保方逆瑾擅政事多齟齬時傳公議瑾寢不能容乃以署員外郎再署郎中者誣為非制謫令致仕又以公嘗薦雍泰為失當除其名而怒猶未解又擢其在大同時嘗籍軍丁出銀雇役後為典守者所剋故苛為稽察因以中公幾至不測事未結而瑾敗朝廷用言

者復公官仍致仕而公已卒矣乃贈公太子太保
遣官諭祭命有司治葬事焉公器宇魁岸負抱甚偉
論議洵出若無不可為者法尚嚴峻凡有請託多拒
不行見者敬而畏之顧性孝謹嘗被庭訓撻指出血
後每舉指示人輒感泣不已事二兄禮敬不替家素
饒而自奉儉約至于老猶然所著有憲臺奏議平番
始末東崖稿東崖者其所自號也公生正統丁巳某
月某日卒于正德庚午八月十八日壽七十有四以
辛未某月某日葬其地在城南石甯山之北麓娶夫
人張氏生子詔鄉貢士早卒繼夫人高氏生誥舉進

士擢戶科給事中改翰林院檢討調全州判官讚亦
舉進士擢監察御史改編修調臨淄知縣記詩皆縣
學生詞論亦業舉子曰誌者側室翟氏出也女三其
婿曰浙江按察司僉事楊惟康縣學生晉曰利國子
生趙忤孫七儒舉鄉貢士次仝俯佩儒偕位女孫二
公高祖行五曾祖仕信皆不仕祖實安定縣學教諭
考聚皆以公貴贈資善大夫戶部左侍郎祖妣某氏
妣某氏皆贈淑人其上世譜逸莫可考一日於陞域
隙地得許五公墓誌稱隋楚州刺史法光唐譙國公
紹左相國師又五世為同州刺史八世為宋端明殿

學士簡其子東遷長安又四世為金兵馬都元帥威
西征過靈寶愛其風土始居焉又再世為元百戶玉
則五之考也於是許氏之世系粲然復完人皆異之
公且葬諱至京師奉禮部右侍郎李公希賢狀請予
銘銘曰

陝重周甸地分東西西有名關山川崛竒代生偉人
出為世用屹屹許公有威有重肅肅內憲嚴嚴外臺
有劇必析靡強弗摧赫赫天曹百官是統震撼擊撞
有鎮無恐仕我已我其機在人不然不尤在我者存
明揚在 廷嘉遜于野既老而傳非徒壽者膏之沃

矣有曄其光維源之深其流則長物則有然於人為
大我最公名昭于一代

明故通議大夫禮部右侍郎管國子監祭酒
事致仕贈禮部尚書謚文肅謝公神道碑銘
吾友方石先生謝公卒且葬既閱歲予始得銘神道
之石非忍為慢重之也公諱鐸字鳴治別號方石台
之太平人少為縣學生天順己卯舉鄉薦第二甲申
登進士第入翰林為庶吉士乙酉授編修成化丁亥
預修

英廟實錄成陞從六品俸乙未秩滿遷侍講仍加從

五品俸戊戌以家艱去既免喪謝病居數年弘治初臺諫部屬言事者交薦之會以修

憲廟實錄徵乃起供職庚戌擢南京國子監祭酒辛亥致仕歸薦者以十數特擢禮部右侍郎管國子祭酒事命吏部遣使即其家起之公再辭不得道得疾徑歸復請而敦迫日益急乃行至京辭所加職以本官治事亦不許居二年辭至再癸亥修歷代通鑑纂要命為潤色官疏又五六上後乞歸養疾乃許命給驛以行令有司俟病愈聞奏正德戊辰吏部例上其名會權姦用事恐其復起遂仍致仕庚午正月